

# 12avla Surselva Trophy – ils golfists han eruiu ils campions

Dus seniors van cun la plema

DA PAUL DUFF / ANR

■ (anr/ff) En treis turniers da golf han ils commembers dils clubs da golf en Surselva eruiu ils campions. Giugaduras e giugadurs han nezegiau la bialaura e giugau a Breil, a Sagogn ed a Selva sin las treis piazzas da golf dalla Surselva. Ella rangaziun ch'ensiara dunnas ed umens ein dus versai seniors alla testa suenter ils treis dis da giug. Denter ils numerus turniers sin las piazzas da golf ei la Surselva Trophy in termin impurtont. Campiunessa ni campion dalla Surselva ei numnadamein in tetel da

prestisch. Ella ni el vegnan erui en treis turniers sin las treis piazzas da golf dalla Surselva. Quellas semuossan zun differentas e pretendan dallas giugaduras e dils giugadurs bien sentiment da s'adattar allas situaziuns che semidan. La piazza da Sagogn cun 18 ruosnas ha liungs irals ed ils greens ein ondulai sin in grond spazi. El priel dalla Foppa muossa il termometer savens aultas temperaturas, in factur che sa influenzer il giug. A Breil sesanfla la piazza da nov ruosnas sin la terrassa, denton buca gest els bials plauns. Dad in iral a l'auter dat ei d'ascender e descender altezas e bassezas. La situaziun sulegli-

va ei favoreivla per la vegetaziun ed ils praus da giug ein bials ed ulivs. Tut auter sin la piazza a Selva. En in'altezia alpina ei il clima pli crius. La neiv dalla lavina cuviera il vau dil Rein gest sper ils irals dalla piazza da golf. La piazza ei aviarta gest avon duas jamnas ed ils fastitgs dil criu unviern ein aunc veseivels. Era cheu ston giugaduras e giugadurs s'adattar e giugar cun precauziun ed exactadad.

Ils umens han saviu far quei pli bein che las dunnas. Quei demuossa la rangaziun nua che sulet ina dunna ei classada els 10 emprems rangs. Sco victurs han ils dus seniors *Claudio Plaz* da Sagogn e *Toni Jacomet* da Sedrun partiu igl emprem plaz. La categoria netto ha *Werner Casanova* da Sagogn victorisau. Impurtonta ei era la part amicabile denter ils commembers dils treis clubs stada. Els restaurants da golf ei quei aspect vegnius tgirau ed ha satisfatg alla finimira dalla concorrenza sportiva.

## Success impressiunants da Gianna Maissen e Toni Jacomet

La sesiun da golf a Selva haveva aunc buc entschiet e gia han dus commembers dil Club da golf Sedrun dau la ceschun da selegrar. Lur prestaziuns en turniers d'ordeifer ein remarcablas e meretan menziun e respect. La giuvna *Gianna Maissen* (17) da Sedrun ha dau turniers dalla turnea svizra da junioras sin las renomadas piazzas da golf a Crans Montana, Vuissens, Basilea ed autras piazzas. Tier mintga turnier eis ella sequalificada per il proxim. Quei ei stau pusseivel sulet cun esser rangada sils plazz davon, actualmein eis ella 7avla ella concorrenza. Cun in ferm giug, mo cunzun cun fermezia mentala eis ella s'establida denter las meglieras junioras dalla Svizra. A Tavau el gimnasi anff'ella bunas premissas per s'entrenar. Leu ha ella era buns trenaders

sco *Corsin Caviezel* e *Fabienne In-Albon*. Ils finals dalla turnea suondan els proxims meins. Nus giavischein a Gianna bien success.

Ils seniors dalla regiun sid dalla Svizra han dau il campinadi ils 29 da matg ad Ascona. Cun ina prestaziun da campion ha *Toni Jacomet* gudignau la concorrenza e declassau plirs giugadurs seniors cun in meglier handicap che quei ch'el ha. En quella concorrenza ha il giugadur da Sedrun buca saviu far valer igl avantatg da siu handicap da 7, il resultat ei vegnius eruiu strictamein tenor fridas ch'el ha duvrau da dar las 18 ruosnas dil plaz patricial d'Ascona.

Cun 73 fridas ha el dau sulet ina frida sur la valetaziun dalla greva piazza tessinesa. A Maissen e Jacomet s'auda nosa gratulaziun per lur bunas prestaziuns sportivas.

## 12avla Surselva Golf Trophy, rangaziun brutto:

1. Claudio Plaz Sagogn e Toni Jacomet Sedrun	77 puncts
3. Corsin Steiner Sedrun	69 puncts
4. Bernhard Elvedi Sagogn	60 puncts
5. Eddy ter Braak Sagogn	57 puncts
plinavon:	
8. Lucia Schmid Sedrun	48 puncts

## Rangaziun netto:

1. Werner Casanova Sagogn	105 puncts
2. Plaz Claudio Sagogn	100 puncts
3. Kunz Walter Sedrun	93 puncts



Toni Jacomet ha gudignau il campinadi da seniors Svizra sid 2019.



Gianna Maissen ei ina golfista cun grand potenzial ed in avegnir empermettent sil sector da golf.

FOTOS MAD

# Installaziun da sur Dirk Jasinski a Lumbrein

Biala festivitad pil plevon da Cumbel/Peiden, Lumbrein, Suraua e Vrin

DA GIUSEP CAPAUL

■ L'installaziun d'in plevon – tras surdar ed introducir el uffizialmein egl'uffeci parochial cun tut ses dretgs ed obligaziuns – ei adina stau ina gronda festivitad. En biala e solemna fuorma ei era l'installaziun da sur *Dirk Jasinski*, plevon dalla pleiv catolica-romana da Lumnezia, sesplegada dumengia vargada ella baselgia da s. Martin a Lumbrein (che celebrava gest quei mument supplementarmein il di da dedicaziun-baselgia).

Installar in plevon cumpeta mintgama al decan. Igl ei stau per quel dalla Surselva, sur *Tomasz Piotr Drwal*, plevon a Trun, l'emprema installaziun insumma. El ei in bien enconuscent da sur *Jasinski*, ch'ei d'origin polac, denton carschius si en Nordrhein-Westfalia (Tiara-tudestga). Leu ha el era entschiet cul studi da teologia, ei vegnius 1994 en Svizra, cuntinuau da studiegir teologia a Cuera e vegnius ordinau leu 1997 spiritual. Suenter zacons onns da pastoraziun a Dübendorf (Turitg) eis el vegnius 2001 en Surselva ed ha pastora ad Andiast, Siat e pli tard era a Rueun. Suenter 17 onns eis el vegnius en Lumnezia ed ha surpriu sco plevon-administratur la primavera digl onn vargau la pleiv catolica-romana da Lumnezia e priu dimora a Lumbrein.

L'installaziun introducescha il sur decan cun preleger il decret da nominaziun da sur Dirk sco plevon tras uestg *Vitus Huonder*. Lu suonda la surdada dalla clav-baselgia, dil tabernachel e dil cusch d'evangelis. En siu priedi fa sur de-



Sur Dirk Jasinski muossa ils simbols retscharts per siu uffeci – la clav-baselgia e quella dil tabernachel – cun sur decan Tomasz Piotr Drwal.

FOTO I. SGIER

can – en vesta a Tschuncheimas – menziun dall'unitad ella baselgia – oz in grev problem. Necessari seigi mintgacass: Carrezar in l'auter, tscherchar harmonia culs carstgauns e surtut encurir Diu.

Il survetsch divin d'installaziun ei vegnius embellius dil Chor mischedau Vrin/Surin – sut direcziun da *Pieder Alig*

– tras la «Messa en c-dur» da *Marcel Solèr* ch'ha era gest accumpignau ella all'ogla.

## Beinvegni da laud al niev plevon

Alla fin dil survetsch divin plaidda il president dalla pleiv catolica-romana da Lumnezia, *Alexander Casanova*, Lum-

brein. Ses plaids drezza el al sur decan sco era al gest installau plevon ed a sur *Albert Riederer*, Vella, che segida ora reguladamein ella pastoraziun dalla vasta pleiv lumneziana ed ha concelebrau. Beneventai vegnan plinavon: il president dalla vischnaunca Lumnezia, *Duri Blumenthal*, ed il parsura dalla pleiv Lumnezia

miez, *Marco Sgier*. Pli tard ein aunc ils ulterius plevons dalla vallada vegni vitier: sur *Peter Aregger*, Vella, e sur *Matthias Andreas Hauser*, Val S. Pieder.

Laud meritau exprima il president dalla pleiv a sur Dirk. Quel plaidd e scrivi oreifer romontsch, seigi in pastur dallas olmas capavel, curtseivel, spontans, hagi ureglia aviarta e fetschi in prudent sbargat denter il vargau e nies temps. Il parsura giavisch a sur Dirk forza, plasher e la benedicziun da Diu per sia pleiv cun otg baselgias e 14 capluttas.

Sur Dirk Jasinski, impressiunau da tonta renconuschientscha, engrazia per la confidanza, l'elecziun ed al decan per l'installaziun. Cun il «Te Deum» va il survetsch divin d'installaziun a fin.

In grond pievel fa suenter messa sil plaz avon baselgia part digl aperitiv e gauda las produczions dalla Societad da musica da Lumbrein sut direcziun da *Gian Peider Casanova*. Ils envidai e representants ord tuttas pleivs laian lu gustar igl oreifer past el restaurant Pèz Regina. Ei regia leu – sco dapertut quei di – legria da ver survegniu in bien niev plevon.

## Nominaziun

Sut il datum dils 10 da matg 2019 ha uestg Vitus numnu sur *Jasinski* sco plevon dallas pleivs S. Martin a Lumbrein cun la caplania da s. Clau a Surin; Nosadunna a Vrin; s. Stiafen a Cumbel/Peiden, s. Gion a Camuns, s. Luregn a Surcasti cun la caplania da s. Carli Borromeo ad Uors e s. Balun (Appolinari) Tersnaus.